



E-mail-ikkut nassiussaq uunga:
Inatsisartunut ilaasortat

**Siunnersuutip matuma siullermeerneqarnerani
saqqummiunneqartunut apeqqutitut akissuteqaatit: Pisortat
Pisiortortarneranni Neqerooruteqartitsinermi Maalaaruteqartarfik
pillugu Inatsisartut inatsisaat (imm. 23)**

17-10-2018

*Apeqqut 1: Sooq Kalaallit Nunaanni suliffeqarfiit namminersortitat aamma
suliffiit mikisut akulerunneqanngillat neqeroortitsisarnermi inatsisissamut
siunnersuutip tusarniaassutigineqarnerani?*

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Oqallinnermi siunnersuutip siullermeerneqarneranut atatillugu: Pisortat Pisiortortarneranni Neqerooruteqartitsinermi Maalaaruteqartarfik pillugu Inatsisartut inatsisissaattut siunnersuut nioqqutissanik aamma kiffartuussinernik pisortat aamma pisortat ingerlatsiviini, qaqinneqarpoq apeqqut tusarniaanermi periaaserineqarsimasut pillugit, minnerunngitsumik pisortat suliffeqarfiutaat namminersortitat aammalu nunatsinni suliffeqarfiit mikisut akulerunneqarsimanninneri pillugit.

Neqeroortitsisarneq pillugu inatsisissatut siunnersuutip tusarniaassutigineqarnerani malinneqarsimapput “Maleruagassat illup iluani aamma illup avataani malittarisassanik tusarniaasarnermik, kunngip peqqussutaanik, nassuiaasianik il. il. tusarniaasarnermi maleruaqqusat”, tamannalu uani ataani nassuiaateqarfigineqassaaq.

Maleruagassani pineqartuni nassuiarneqarpoq pisortat qulliusut akisussaaffigisaraat alleqtaasutut pisortat ingerlatsiviisa akulerunneqarnissaat, tamatumani aamma assersuutigalugu pisortat suliffiutaat namminersortitat. Assersuutigalugu Nukissiorfiit toqqaannartumik akulerunneqarsimapput tusarniaavigineqarlutillu siunnersuutip sunniutigisassai pillugit, Naalakkersuisoqarfiup nammineq iluani ataatsimiittarnertigut arlaqartutigut. Tamannalu tassa illup iluani “Maleruagassat illup iluani aamma illup avataani malittarisassanik tusarniaasarnermik, kunngip peqqussutaanik, nassuiaasianik il. il. tusarniaasarnermi maleruaqqusat”-nut naapertuuppoq.

Suliffeqarfinnik minnernik akulerussisimanermut tunngatillugu oqaatigineqassaaq taakkua akulerunneqarsimammata susassaqtut kattuffiit, soorlu inuussutissarsiortut sammiviinut kattuffiit soqutigisaqaqatigiillu

kattuffiisa tusarniaavigineqarnerisigut, assersuutigalugu Sulisitsisut. Tamannalu aamma naapertuuppoq illup iluani malittarisassanut “Maleruagassat illup iluani aamma illup avataani malittarisassanik tusarniaasarnermik, kunnqip peqqussutaanik, nassuiaasianik il. il. tusarniaasarnermi maleruaqqusat”.

Kiisalu aamma siunnersuut marloriarluni tusarniaassutigineqarsimavoq tamatumunngalu atatillugu aamma Naalakkersuisut tusarniaasarnernut quppersagaatigut tamanut saqqummiunneqarsimalluni, ulluni 18. december 2017 – 22. januar 2018 aammalu 21. juni 2018 – 18. juli 2018.

Taamaasillunilu tusarniaasarnernut tunngatillugu malittarisassat nalinginnaasut malinneqarsimapput.

Taamaakkaluartorli aamma ilassutitut tusarniaasoqaqqinnissaa immikkut siunnersuummut matumunnga atatillugu pisortat suliffiutaannut namminersortitanut atasumik kissaatigineqarsimavoq. Kissaatigineqartoq taanna naammassiniarneqarpoq, taamaattumillu sukkasuumik tusarniaanermik neqeroortitsisarnermut siunnersuut aamma maalaaruteqartarneq pillugu siunnersuut pillugit tusarniaasoqaqqissaaq siunnersuutit taakkua ataatsimut atasumik isigineqartussaammata. Tusarniaaneq ingerlanneqarpoq 21. oktober 2018-imut killilikkamik.

Tusarniaanermi akissutaasut Aatsitassarsiornermut Inuussutissarsiornermullu Ataatsimiititaliamut ingerlatinneqassapput, taamaasillutillu ilaasinnaallutik siunnersuummut atatillugu isumaliutissiissusiormi.

Apeqqu 2: Periarfissaqarpa inatsisissat siunnersuummi kalaallit suliffiutaasa suliassiinerni salliutinneqarsinnaaneritut?

Oqallinnermi siunnersuutip siullermeerneqarneranut atatillugu: Pisortat oqartussaaffigisaanni suliffeqarfiinilu nioqqutissanik kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisissaattut siunnersuutip siullermeerneqarneranut atatillugu kalaallit suliffiutaasa suliassiisarnermi qanoq oqimaalutarneqartarneri qaqinneqarpoq.

Ataatsimiititaliaq inussiarnersumik qinnuigineqassaaq aalajangersakkat § 17, imm. 4, nr. 4 aamma § 30 isiginiaqqullugit tamatuma nalilersorneqarnerani.

§ 17 -imi aqunneqarput piumasagaatit qanoq ittut piumasarineqarsinnaaneri neqerooruteqartumut, aamma taaneqartut suliassanik tunniussinissamut najoqqutassat. Tunniussinissamut najoqqutassat ”akit pitsaassutsillu akornanni pitsaanerpaamik naleqqiussinerup” assersuutigalugu oqimaalutaasoqarsinnaavoq


piumasaqaatinik immikkuualuttortalinnik, kinaassusersiunngitsumik, naligiissitsisumik atsikkutigiissumillu pissuseqartussaaneq eqqortinniarlugit, pisortallu pisiniarneri piviusumik unammillernermik tunngaveqaqqullugit.

Ingammillu kalaallit suliffiutaasa unammillersinnaassutsimik qularnaarussinnaaneri pillugit pisortat neqeroortitsinerini, periarfissaqarpoq piumasaqaatinik ilanngussinissamut, ilaatigut inuiaqatigiinni akisussaassuseqarneq, tamatumani aamma najukkamit aallaaveqarneq, ilinniartunut sungiusarfissanik pilersitsiniarneq, inunnik atugarissaanngitsunik suliffissaqartitsineq, peqqussutsinik siuarsaniarnermik, piujuaannartitsinermik tunngaveqarneq il.il. eqqarsaatigalugit, takuuk § 17, imm. 4, nr. 4.

Kiisalu aamma § 30-imi ilanngunneqarpoq aalajangersagaq suliassiisup pissusaaffigigaa nalilersussallugu isumaqatigiissutaasussap immikkoortunut arlalinnut agguarneqarnissaa pissusissamisoornersoq. Aalajangersagaq taanna ikkunneqarpoq qularnaarumallugu kalaallit suliffiutaasa unammillersinnaassuseqarnissaat pisortat neqeroortitsinerini, tassami isumaqatigiissutissap annertuup immikkoortunut minnernut aggorneqarnerata periarfissaqartissammagu suliffeqarfiit minnerit akunnattumillu angissusillit allat naligalugit neqeroortitsinerini peqataasarsinnaanissaat.

Eqqaaneqareersutulli pingaaruteqartutut tunngaviuvoq piumasaqaatit taakkua piviusorsiortuunissaat kinaassusersiortuunnginnissaallu, unammillersinnaanermillu piviusumik akornusiisuunnginnissaat. Taamaasillutillu ataatsimut isigisumik tunngavilersuutit kinaassusersiunnginnissamik, naligiissitsinissamik atsikkutigiissaakkamillu tunngaveqarnissaq, pisortallu pisiniarnerat piviusumik unammillernermik tunngaveqarnissaat uppersarneqassaaq.

Inussiarnersumik inuulluaqqusillunga
Med venlig hilsen


Aqqalu Jerimiassen